

## HUNG'UN PAKAI HOU IN SAPAN TAO HITE

Haggai 1:4 “Vo Kamite, idia Nang ho In phatah tah a cheng a, Kei Hou in asesa kijam ham?”

Haggai Themgao Lekhabu ivet le , Israel te hi Babylon gam'a asohchan nao a kona hung kile uva Jerusalem khopia kum phabeppi achen nung uva jong Pathen Hou in asesa kijam chu sahphat hinailou a amahon amaho chen na in ding ho nom tah le hoi tah tah akisah u ahi. Hiche a hin Pakai in Haggai themgao kom a amite het dia Haggai themgao kom a ase ho muthei in aume . Chule Hou in sah na dia thupeh le khonung a phatthei achan diu dol ho thu akimu e.

Pakai yin Israel te, a Nam lhen te chu asohchan nao a kon a ahuh doh in, ama abel diu le ama ahou diu chu adeisah mama ahie. Hinla amahon Pathen geldoh lou a amaho ding bou akigel uva Pathen Hou in sesa asahphat lou jeh un alunghang in, Pakai Phatthei bohna aching tapouve. Muchi tampi atu vang un lhosohga themcha bou amujiuvin, Nehding anei vang un oiva na kham ahipon, Lengpitwi don ding anei vang un chimna kham ahipoi. Hiche hin avetsah chu Pakai thu anit lou uva ama agel khoh loujeh uva Pathenin phatthei aboh lou jeh u ahi.

Ahinla themgaopa in alamkai teu Pathen thusei doh ho aseipeh in hou in sah phat angai dan ho aseipeh in amahon jong pathen in boldia aseipeh bang un alung ahei un Pathen hou in ana sa taove. Hichun Pakai Pathen achung uva akipah in “Kakitep ahitai, Ka um pi jing ding nahiuve”(Haggai 1:13) ati. Chuleh Pakai Pathen Vangboh din akitep e. “Changsal Keosoh hen, Lengpiga, heosoh henlang, kolbuthei le Olive Thing ga heo ta jongle, tua pat vang phatthei kaboh diu ahitai” (Haggai 2:19).

Sopite, “A Pathenu Pakai hikha Nam Mite chu anun nom ui, Pakai in amite dia alhendoh Nam mite anun nom'uve” tin Psalms a akimu e. (Psalms 33:12). Tunin Nam Vangpha ihuive tilou seiding aumpoi. Pathen dihtah houte ihuiva Pathen chate ihu hi ikipa Lou u ham?

Tunin mitamtah gel in, Pathen Hou in sah na dia sum tampi thale jung lunggel sen ngai em? Eima hi Pathen Hou in akihi e, In se deh duh in Pathen kihou jong le adih a ihou le ahijeng e ti jong ium diu katah san e. Adih nai. Hinla Pathen Hou in isah doh uva Pathen hou khom na leh lhagao mangthai ho huhhing na hong a pulut na a inei u leh Pathen Lenggam na toh na hilou ham? Koi Christian khosung a Hou in bei a um em? Amasan eima tahsa hi Pathen Hou in ihi ikihet uva Chuleh midang to jong lhagao thua fellowship ineikhom nadiu Hou in inei diu hi angai khoh ahi ti hi ikihetcheh diu dei um kasai.

Chuleh athupi pen chu Hou in ijat kisa hen lang itobang in thupi kitung doh jongle Pathen alung lhai lou leh phachom ponte. Hijeh chun, eima hi Pathen Hou in theng ihi ikihet uva eima Lungsung Houin asesa kijam ihu jongleh athahbeh a isuhtheng uva isemphat diu hi tunin ana gelkhoh cheh ute. Chutileh Pathen vangbohna idon diu tampi gotsa ahi.

Eiho context :

Pathen lungsed in Agartala ten jong Building Project inei un, hiche a ding hin koima cha hijat a pang in tina aum lou vang in, ijo kham cheh un pan ilaovin, kipa aum lseh jeng e. Lhomcha hijong leu hen Pathen in ithil bol u adih ahileh vang eiboh uva eium pi jing diu ahin, Molsona imu tei diu kinem lel pou hite.

Hinla sopite, Pathen Lenggam natoh na ahin koima tei tei ititheipouve. Min ijat apah em chu athupi pon, nang in napeh chu nakiphal na kham ahia Lungtheng sel a napeh ding joh chu athupi joi. Pathen in adeijoi. Mijousen pe soh kei a kipeh da leh kimel sekhante , ahilouleh, aman bon hijat toh a ken jong hijat beh kato lou le jachat aume tia nagel a napeh ahile vang napeh khel ahi. Kigelphan. Lungtheng sel leh kiphal tah a ipeh le Pathen in eimal som diu ahi ti kinem lel pou hite.

Pathen in eimalsom jingun tin maban a jong taona to thon hapan in pang jing u tin, Pathen Hou in Hoitah itundoh uva asung a Pathen ihou uva, mite a dia phatthei channa ihi diu kinem utin Chuleh Ipao Pathen in jona eimusah diu ahi ti kinemlel pou te.

Ijakai ibol jouseu Pathen loupina din bol'ute.

Kakipah e.

~Minlien Changsan,

Secretary, KWS-Agartala,

Dated:28.09.2016